

08 MAR 1999

AGONG KIRIM TAKZIAH KEPADA BAHRAIN

KUALA LUMPUR, March 8 (Bernama) -- Yang di-Pertuan Agong Tuanku Ja'afar telah mengirinkan perutusan takziah kepada Bahrain berhubung dengan kemangkatan Allahyarham Amir Shaikh Isa Salman Al Khalifa.

Dalam perutusan kepada Amir baru negara Asia Barat teluk itu Shaikh Hamad Isa Al Khalifa, yang dikeluarkan oleh Wisma Putra di sini hari ini, Tuanku Ja'afar berkata baginda dan Raja Permaisuri Agong Tuanku Najihah sedig dengan kemangkatan Shaikh Isa pada hari Sabtu.

Tuanku Ja'afar berkata Allahyarham Shaikh Isa telah meninggalkan legasi pembangunan dan keamanan sepanjang pemerintahan baginda yang telah menyumbang kepada kestabilan Bahrain dan juga Asia Barat.

Perdana Menteri Datuk Seri Dr Mahathir Mohamad dalam perutusan serupa kepada Shaikh Hamad, berkata rantau itu dan dunia telah kehilangan seorang pemimpin terulung dan paling berpengalaman.

Beliau berkata Allahyarham telah memberi sumbangan yang signifikan terhadap hubungan antara Bahrain dan Malaysia dan kemangkatan baginda adalah satu kehilangan juga kepada rakyat Malaysia.

Dalam perutusannya kepada rakan sejawatannya Shaikh Khalifa Salman Al Khalifa, Dr Mahathir berkata allahyarham sudah tentu akan mendapat tempat yang sewajarnya dalam sejarah.

Menteri Luar Datuk Seri Syed Hamid Albar mengirinkan perutusan yang sama kepada rakan sejawatannya, Shaikh Mohammad Mubarak Al-Khalifa.

-- BERNAMA

RZS WAT